



PRESIDENCY OF THE  
COUNCIL OF  
MINISTERS

**DISKURSU MINISTRU PREZIDÉNSIA KONSELLU MINISTRUS**

**SUA EXELÉNSIA MINISTRU AGIO PEREIRA**

**IHA OKAZAUN ANIVERSÁRIU DESTAKAMENTU INTERFET BA  
DA-25**

**NO**

**SERIMÓNIA BENSAUN BA FATIN NE'EBÉ PROPOIN BA  
MEMORIÁL NO MUZEU INTERNASIONAL INTERFET NIAN  
NE'EBÉ DEDIKADU BA MANUTENSAUN PÁS**

**Loron 14 fulan-setembru tinan 2024**

**Tuku 10:00**

**Eliportu Antigu INTERFET nian**



*Distintu Konvidadus, Membrus antiga Komunidade INTERFET, Veteranu no Ilustre Amigu sira,*

Iha okaziaun selebrasaun aniversáriu ba dala-25 kona-ba destakamentu INTERFET, ita hasoru malu iha momentu sagradu ne'e hodi fó bengan ba fatin ida-ne'e, eliportu antigu INTERFET nian, no fó omenajen ba konstrusaun memoriál INTERFET iha futuru no, ita espera, muzeu ida ne'e, sei sai símbolu aten-barani, solidariedade no esperansa nian.

Okaziaun memorável ida-ne'e nu'udar momentu reflesaun, gratidaun no selebrasaun ba misaun ida ne'ebé husik hela marka ne'ebé labele hamoos, tantu iha istória Timor-Leste nian no mós iha ema hotu nia fuan ne'ebé halo parte.

Tinan ruanulu-resin-lima liubá, hodi hatán ba apelu urjente ba pás no estabilidade, INTERFET – forsa internasionál ida ne'ebé kompostu hosi mane no feto aten-barani sira hosi mundu tomak – hakat ba oin hodi fó apoiu ba povu Timor-Leste. Sira-nia misaun la'ós de'it operasaun militar ida, maibé espresaun solidariedade no kompromisu profunda ba direitus umanus no justisa.

Ba veteranu no membru INTERFET hamutuk 16,000 ne'ebé ohin hamutuk ho ita, no ba sira ne'ebé la hamutuk: Kabu Russell Eisenhuth; Kabu Stuart Jones no Soldadu Ashley Baker, ami hato'o ami-nia agradesimentu boot tebes. Ita-boot sira-nia korajen no





dedikasaun iha tinan 1999 sai fundamentál hodi ultrapasa períodu krítiku ida iha Timor-Leste nia viajen ba ukun-rasik an. Ita-boot sira-nia sakrifísiu no perseveransa la haluha, no aniversáriu ida-ne'e hanesan sasin ida ba impaktu duradoura hosi ita-boot sira-nia servisu.

Timor-Leste hahú ona jornada naruk husi kedas inísiu. Povu Timor nia reziliénsia no forsa nakfila rai ida ne'ebé uluk hasoru adversidade boot sai nasaun ida ne'ebé prósperu. Progresu ida-ne'e hanesan omenajen ida ba INTERFET nia esforsu koletivu no parseria ne'ebé lori tempu naruk entre Timor-Leste no Komunidade Internasionál.

Hanesan ita selebra aniversáriu ba dala 25 ida-ne'e, mai ita mós refleto kona-ba valór sira ne'ebé orienta misaun: pás, justisa no kooperasaun internasionál. Prinsípiu sira-ne'e kontinua sai relevante ohin loron hanesan prinsípiu sira iha sékulu kahaat ida liubá. Prinsípiu sira ne'e fó hanoin mai ita katak, ita-nia serbisu nunca hotu no, ita-nia kompromisu komún ba ideál sira-ne'e tenke metin nafatin.

Aniversáriu ida-ne'e la'ós de'it tempu ida atu fó onra ba pasadu, maibé mós oportunidade ida atu hafoun fali ita-nia dedikasaun ba jornada dame no konstrusaun nasaun ne'ebé la'o daudaun no apoiu ba Timor-Leste. Mai ita selebra saida maka ita halo ona iha pasadu, enkuantu hateke ba futuru ho esperansa no determinasaun.





Ami mós aproveita momentu ida-ne'e atu agrade-se ba família no comunidade sira ne'ebé mak apoia no luta hamutuk ho sira ne'ebé maka serbí sira. Ita-boot sira-nia forsa no reziliénsia maka parte ida ne'ebé importante tebes hosi istória ida-ne'e, no ami fó onra ba ita-boot sira-nia papél iha istória hamutuk ida-ne'e.

Ohin ita halibur iha-ne'e, ita unidu la'ós de'it tanba objetivu memoriál ida-ne'e nian, maibé mós tanba maneira respeita ne'ebé hanesan ba valór sira ne'ebé nia representa. Ita hein katak fatin ida-ne'e sei hamriik iha tempu badak nu'udar testamuña legada ne'ebé dura husi sira ne'ebé servisu iha INTERFET nia okos, liuhusi sira-nia korajen no dedikasaun ajuda orienta Timor-Leste ba futuru ida ne'ebé nabilan liu.

Iha tinan sira dezde xegada INTERFET nian, ita haree nasaun ida mosu hosi konfliktu nia mahon no hakuak promesa dame no autodeterminasaun. Memoriál ida-ne'e sei sai hanesan sasin ida ba sakrifísiu sira ne'ebé halo ona, vida sira ne'ebé fo-an no espíritu ne'ebé la nakdoko hosi povu ida ne'ebé hatudu ona reziliénsia no forsa ne'ebé estrordináriu.

Bensan ohin nian maka momentu ida ho signifikadu kle'an. Ida-ne'e mak oportunidade ida atu kuda iha fatin ida-ne'e sentidu reverénsia no gratidaun nian. Ita husu atu fatin ne'e nia esénsia nakonu ho dame no sai nu'udar fonte inspirasaun no reflesaun ba ema hotu ne'ebé vizita fatin ne'e.





Atu memoriál ida-ne'e sai hanesan matadalan esperansa nian, hanesan lembransa ida kona-ba esforsu kolektivu ne'ebé hakat liu fronteira no diferensa sira hodi kria vizaun ida ne'ebé hamutuk ba dame. Hein katak memoriál ida-ne'e bele fó onra ba aten-brani sira ne'ebé mai iha Timor-Leste ho intensaun atu restaura justisa no apoia povu Timor nia direitu ba futuru ida ne'ebé di'ak liu.

Mai ita reza hodi fó bengan ba fatin ida-ne'e, mai ita mós hafoun ita-nia kompromisu ba valór sira ne'ebé lori ita mai iha-ne'e: respeito, unidade no dedikasaun kle'an ba prinsípius dame no dignidade umana. Hein katak memoriál ida-ne'e serve la'ós de'it atu komemora pasadu, maibé mós atu inspira jersaun sira iha futuru atu kontinua serbisu harii mundu ida, iha ne'ebé valór sira hanesan ne'e defende no respeita.

Iha fulan hirak tuirmai, ita sei hahú konsulta lubun ida ho nasaun kontribuinte sira atu asegura katak dezeńu no dezvoltimentu memoriál nian replete esperiéncia no perspetiva oioin hosi sira hotu ne'ebé hala'o papél iha misaun istóriku ida-ne'e. Konsultasaun sira-ne'e sei foka ba área fundamentál oioin: Konseitu: Ita sei buka atu inkorpora elementu signifikativu sira hosi nasaun kontribuinte ida-idak, hodi asegura katak dezeńu memoriál nian inkorpora espíritu kolektivu no kontribuisaun sira hosi ema hotu ne'ebé envolve. Ita konvida sujestaun sira kona-ba karakterístika dezeńu nian, símbolu no tema sira ne'ebé mak iha sintonia ho valór no esperiéncia sira hosi nasaun ida-idak; Prosesu





no envolvimento: Ita iha kompromisu ba prosesu inkluzivu ida ne'ebé valoriza kontribuisaun hosi parte interesada hotu-hotu. Konsulta sira sei fornese plataforma ida ba diálogu no kolaborasaun, hodi permite ita atu hatán ba preokupasaun ruma no integra komentáriu valiozu iha faze planeamentu no ezelesaun; Sensibilidade kulturál: Haree ba importánsia husi memoriál ida-ne'e ba povu timoroan no comunidade internasionál, ita sei serbisu besik ho peritu kulturál no representante sira husi nasaun kontribuinte ida-idak atu garante katak memoriál ne'e dezeña no konstrui ho respeitu boot liu ba kontestu kulturál no istória.

Ita fiar katak abordajen kolaborativa ida-ne'e sei la'ós de'it destaka signifkadu hosi memoriál, maibé mós sei hametin relasaun entre nasaun sira ne'ebé halibur hamutuk hodi fó apoiu ba Timor-Leste durante períodu krusiál ida iha ninia istória.

Ita-nia objetivu mak atu kria memoriál ida ne'ebé la'ós de'it símbolu lembransa nian, maibé mós selebrasaun ida ba solidariedade internasionál no ba valór sira ne'ebé hanesan mai ita hotu. Serbisu hamutuk, ita bele garante memoriál ida-ne'e hanesan omenajen ida ne'ebé dura ba korajen no dedikasaun hosi ema hotu-hotu ne'ebé kontribui ba INTERFETninia misaun.





Ita fiar bele serbisu hamutuk ho ita-nia parseirus iha iniciativa importante ida-ne'e. uluk-nanain, obrigadu ba ita-boot sira-nia apoiu no kompromisu kontínuu hodi fó onra ba legadu INTERFET no ninia kontribuisaun estraordináriu ba pás no esforsu umanitáriu nian.

Mai ita kontinua ho sentidu haraik-an no ho onra, tanba ita hatene katak memoriál no muzeu ida-ne'e sei sai hanesan omenajen moris ida ba ligasaun ne'ebé metin entre Timor-Leste no comunidade internasionál – ligasaun ida ne'ebé harii iha terus ninia laran no hametin hosi ita-nia esperansa hamutuk ba futuru ida ne'ebé hakmatek.

Atu taka, mai ita hanoin katak INTERFET nia legadu la'ós de'it iha marku sira ne'ebé atinje ona, maibé mós iha lasu sira ne'ebé dura ba amizade no kooperasaun ne'ebé kontinua forma ita-nia mundu. Bainhira ita haree fali ba kotuk, tinan 25 ne'e, mai ita hetan inspirasaun husi espíritu unidade nian ne'ebé define misaun no kompromete ita-nia an ba serbisu ne'ebé la'o hela atu harii mundu ida ne'ebé justu no pasífiku.

*Obrigado, no atu fatin ida-ne'e hetan bengan ho naroman esperansa nian no espíritu unidade nian.*

